



Fasnacht 2020

Vereinigte Kleinbasler 1884 Alti Garde

Statt Kaoote und Vandaale, duet jetzt s Bruuchtum wiider straale

Wär vyyl schafft und grampfe duet,
het ab und zue au Freyzyt z guet.
Me wanderet und musiziert,
spörtlet und isch angaschiert
in Clique, Clubs und in Verein;
vermissee möcht die Freyzyt kein
Doch mängge het drvo scho z vyyl,
das fiert denn glyy zue Langewyyl.
Do drus entstöön die radikaale
Neo-Kaoote und Vandaale.
Wo denn bi Fuessball Mätsch fruschiert
als schwarze Blogg zem Spiil marschieret.
Si zünde Pyros und Pedarde,
dien nochem Spiil uff d Gegner warte,
zum die z vermöble und z verhaue
um so dr aige Fruscht z verdaue.
Mir frooge uns was isch dr Grund,
dass d Jugend oft so uuse kunnt?
Intelligänz isch nümme wichtig,
sich zämme spüüre die neu Richtig.
Me reedet nümme miteneand
het nur no s Handy in dr Hand.
Drby wird alles hinterfroggt
und statt gleert uff d Strosse ghoggt.
Statt dängge und e Lösig sueche
goot me an Demos und duet flueche.
S git nur ai Thema „Klima Gryyse“,
mir Alte sin drby die Myyse
wo Zeiche vo dr Zyt nit hööre
und schyynts die ganzi Wält zerstööre.
Us all däm gits, s isch lyycht z veroote
Vandaale und erscht rächt Kaoote.
Mir Ältre finde das nüm toll,
kurz gsaiit, mir hänn jetzt d Nase voll.
Doch s git no Ort wo s friidlig isch,
wo d unter vyyle Zfriidne bisch.
Bruuchtum, Tradizzion, Folklore,
wärde wiider neu geboore.
E Hampfle Byschbiil soll euch zeige
wie gross dr ganzi Bruuchtum Reige

S Eidgenössisch Schwingfescht bsueche
Lüt wo s urchig Bruuchtum sueche.
Schwinger stygge do in d Hoose,
brobiere denn mit zieh und stosse,
mit Hooge, Brienzer, Fuessstich, Gamme
dr Gegner uff e Rugge z ramme.
Wenn ain dr ander zue sich paggt,
könsch maine syg e Liebesaggt.
Mit Wyberhooge, Kurz und Schlungge,
duet ain e Senn ins Säägmääl dungge.
Denn butzt är ihm dr Drägg vom Rugge,
dass är nit mee vo däm muess schlugge.
So kämpfe die vo frieh bis spoot,
bis au im Letschte d Luft us goot.
Und däm wo gwünnt, wär hät das dänggt,
wird denn am Schluss e Muuni gschänggt.
Zueschauer nämme voller Luscht
E Brotwurst und e Bier zer Bruscht
S git kaini Demos, kai Kaoot
Wie schön und friidlig das doch goot!

Folklore isch nit numme s Schwinge,
grad so luschtig isch au s Singe.
Wenn Senne joodle miteneand,
verliere d Fraue dr Verstand
und gmischi Chöör mit schöne Fraue,
dien s Volgg grad us de Sogge haue.
Zem au die höggschte Döön yyzfange,
hänn d Männer schyyns im Sagg e Zange
und mit de hoche Döön ganz oobe,
singe si sogar Synkope.
An Joodlerfescht wird nit nur gsunge,
es wärde au no Faane gschwunge.
Sy fliege hoch grad wie im Draum
und lande au e mol im Baum.
Vor Riehrig föön d Lüt afo hüüle
längt ain drnäbe gits e Büüle.
So fyrt me Bruuchtum Hand in Hand
als Patriote miteneand.
S git kaini Demos, kai Kaoot
Wie schön und friidlig das doch goot!

No ganz vyyl Volggsbrüch finde statt,
s git sicher ain in jeder Stadt.
In Sursee wird bi Nacht und Näbel
e Gans enthauptet mit em Säbel.
In Lieschtel renne dunggli Wäase
dur s Stedtli mit vyyl Fүүr im Bäase.
Dr Vogel Gryff isch do für s Gmiet,
me lüpft dr ganz Daag schwarzi Hiet.
In Züri duet me, s isch zem lache
e Fүүrli für e Schneemaa mache
und in Bärn es fiert ze Dräne
isch dr Ziibelemärt z erwäne.
S git Winzer- und Oktoberfeschter,
Silveschterchause am Silveschter.
Bi Volggsläuf duet me Runde drülle,
an Banndägg drfür d Lampe fülle.
Au ghornusst wird an vyyle Ort
Das isch e ächte Schwyzersport.
An d Äplerfeschter, s isch e Hit,
rennt s ganze Volgg und macht dort mit.
Me luegt wie Gwäggi mit de Händ
gstosse wärde wyt ins Gländ.
Au Alphornblöoser hänn s Vergniege
und bloose bis sich d Balgge biege.
Hinde bloost ain dry wie gschöört,
damit me vorne öbbis höört.
Bösi Tschäggätä, jetzt schnell is,
gits im Lötschetal im Wallis.
Geissle-Glöpfer gits z Luzärn
die vyyle Fän die hän das gärn.
Z Basel könnstsch das grad vergässe,
by uns do wärde Glöpfer gässe.
S git kaini Demos, kai Kaoot
Wie schön und friidlig das doch goot!

Dr schönschti Volggsbruch das ich woor
Isch unsri Fasnacht jedes Joor
Drum gniesse mir drey Dägg am Stügg
und das kaootefrey, zem Glügg.

D Ladäärnen-Uusstellig uff em Minschterblatz und d Waagen- und d Reggwisyten-Uusstellig bi dr Kasäärne sin vom Määntig znacht bis am Mittwoch demorge. Deert und an de 3 Verkaufsständ in dr Stadt ka me au alli Zeedel und Schnitzelbängg, d Blaggedde und dr Rädäbängg kaufe.

D Zeedel-Läasesede isch am Sunntig no dr Fasnacht, vom Fimfi bis am Siibenli zoobe in dr Baseldytsche Bihni im Lohnhof. Dr Yydritt isch vergäbe.

Buebe und Maitli kenne ab em 7. Altersjohr in dr Pfyffer- und Drummelschuel vo dr VKB gratis e halb Johr go schnubbere.

Yyschryybe kasch di im VKB-Käller an dr Clarastrooss 57, im 2. UG am Määntig, 09. Meerz 2020 vom Säggis bis am Achti zoobe.

Meh Informazioone läase und Aamäldige abschigge ka me unter:
www.vkb.ch bzw. **jungi@vkb.ch**